

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA

VASEGA FEOLOLO



2  26



AUKUSO – TESEMA



SAUNIA : OFISA O A'OA'OGA KERISIANO

VASEGA FEOLOLO - FA'ASOLOGA O MATAUPU

AUKUSO 02, 2026 – TESEMA 13, 2026

ASO/MASINA

MATAUPU

TUSI FAITAU

MANATU TAIALA O AUKUSO O LE ATUA AUAI IA I TATOU

- | | | |
|--------------------|---------------------------------|----------------|
| 1. Aukuso 02, 2026 | Aua le mana'o tele | 1Tupu 21:1-16 |
| 2. Aukuso 09, 2026 | O le pepelo o Anania ma Safaira | Galuega 5:1-11 |
| 3. Aukuso 16, 2026 | O le mauoa ma le tagata mativa | Luka 16:19-25 |
| 4. Aukuso 23, 2026 | Ua usitai Saulo i lona Tama | 1Samuelu 9:1-5 |
| 5. Aukuso 30, 2026 | MATAUPU FA'AMANATU | |

MANATU TAIALA O SETEMA O LE ATUA FAITAILAGA

- | | | |
|--------------------|----------------------------|------------------|
| 6. Setema 06, 2026 | Ia fai mea sili | Kenese 4: 1-7 |
| 7. Setema 13, 2026 | O le ataai o Iesu | Mareko 6: 1-13 |
| 8. Setema 20, 2026 | E leaga le ola faamaualuga | Tanielu 4: 28-33 |
| 9. Setema 27, 2026 | MATAUPU FAAMANATU | |

Oketopa 04, 2026 Oketopa 25, 2026 (Faamanuia le Atua i Tapenaga mo le Lotu Tamaiti)

MANATU TAIALA O NOVEMA O LE ATUA AGALELEI

- | | | |
|---------------------|---------------------------------------|------------------|
| 10. Novema 01, 2026 | Malaga faatasi ma le Atua | Mataio 14: 22-27 |
| 11. Novema 08, 2026 | Ua faamagalo e Iesu lona uso o Iakopo | Kenese 33: 1-5 |
| 12. Novema 15, 2026 | Ua faamalolo le tagata pipili | Galuega 3: 1-10 |
| 13. Novema 22, 2026 | Ua toetu mai Lasalo | Ioane 11: 40-45 |
| 14. Novema 29, 2026 | MATAUPU FA'AMANATU | |

MANATU TAIALA O TESEMA O IESU O LE TUPU

- | | | |
|---------------------|--------------------------------|---------------|
| 15. Tesema 06, 2026 | Ua faaali le Agelu ia Sakaria | Luka 1: 18-25 |
| 16. Tesema 13, 2026 | Ua fanau Iesu i le fale o manu | Luka 2: 1-7 |

MANATU TAIALA O AOKUSO: “O LE ATUA AUAI IA I TATOU”

ASO SA- AOKUSO 02, 2026

MATAUPU: “AUA LE MANA’OTELE”

TUSI FAITAU: 1 Tupu.- 21:1-16

SINI: Ia malamalama tamaiti ia gata le manao i mea ua tatou maua e tusa o le foa’i a le Atua.

TAULOTO: “O LE ATUA AUAI IA I TATOU, MA TE SILAFIA MEA UMA”

FESOASOANI MO FAIAOGA: E fa’atalofa atu, ia outou Susuga i Faiaoga o le Vasega Feololo i lenei foi Kuata amata o le fa’ai’uga o lenei tausaga 2026. Malo le soifua manuia, fa’afetai mo le soifua ofoina i le Atua ma lona finagalo. E iai le talitonuga o lea ua amatalia foi o tatou tiute tauave, e tusa o lo outou vala’auina mo lenei galuega taua, o le a’oa’oina o fanau a le Aoga Aso Sa. Manatu lava ua maua se faasiliga-malosi mai malologa sa feagai ai ma le tau mafanafana ua mou atu. Ia saga’i ane loa mo le Aso Sa muamua o lenei foi Kuata Aoga. E manaia foi ae amata lelei i se fa’afeiloaiga o nai fanau, ina ia fa’aosofia ai lagona fiafia, e auai mai i le Aoga Aso Sa ua amatalia, fai ni nai fesili e uiga ia latou feau sa fesoasoani ai i nai o latou matua, a’o feagai ai ma malologa ua mou atu o le tau mafanafana. A ma’ea ona fa’ailoa lea o le latou mataupu o lenei Aso Sa. **“Aua le manao tele”**. Manatu ua na o se amataga lena e tatala ai ni mafaufauga o le lesona, ae ta’oto atu ia outou Susuga mo le fa’alauteleina o le lesona mo nai fanau, e fua lava e a outou Susuga ina ia o faatasi ma le iloa ma malamalama lelei ai o nai fanau o lo’o outou mafuta. O le tauloto a fanau ua manatu e fa’ataua le tauloto e fanau o manatu taiala o masina ta’itasi, ina ia latou iloa ai le taua o ta’iala e pei ona tu’uina atu, ae a leai ona faatulaga ane lea o ni tauloto mai tusi faitau mo latou. Ia faamanuia atu le Atua i faiva amata o lenei kuata. Manuia le Aso Sa.

FESOASOANI MO LE MATAUPU: O le tatou mataupu o lenei taeao. **“AUA LE MANA’O TELE.”** O ai na te iloina le uiga o le upu mana’o tele.(tu’u le avanoa i fanau se’i fa’asoa ane) Ioe, ‘aua tatou te manana’o fua i tupe ma ofu a isi tamaiti, po’o a lava mea ua tu’uina mai e nai o tatou matua, e tatou te fa’aaogaina, ia lava na e fa’amalieina ai o tatou loto.

O le taeao lenei lea la’a tatou talanoa ai, e uiga i le mana’otele o A’apo i le tovine a Napota. O le laufanua e i le vaega i sasa’e o le Vanu o Isere’elu, o Isere’elu o se tasi o vaipanoa e sili atu ona lafulēmū i le lau’ele’ele anamua o Isaraelu. E fa’asaga tonu mai lava i le isi ituvanu i le itu atu i mātū o le mauga o More, o iinā na tōlauapi ai le ‘autau a Mitiana a o sauniuni e osofa’i le fa’amasino o Kitiona ma ana fitafita. E fa’asasasasa teisi atu lava i le itu i sasa’e le vaipuna o Herota, o lo’o i le ‘auvae mauga o le Mauga o Kilepoa.

O Isere’elu na fausia ai e le tupu o A’apo le pule o le malo i ituaiga e sefulu i mātū o Isaraelu i lona maota tau-tupu, e ui lava o Samaria o le laumua aloa’ia lea. O Isere’elu fo’i na fa’afefe mai ai e Iesepela, le avā nu’u ese a A’apo, i lona fasiotia o Elia le perofeta a le Atua. Na ita Iesepela talu ai sa fasiotia ma le lē fefe e Elia perofeta a Pa’ala, ina ua uma le tofotofoga o le taulaga moni i le Atua lea na fa’atino e Elia i le Mauga o Karamelu.

O Isere’elu la lea na fa’atino ai le solitulafono mata’utia, lea na fasiotia ai Napota le Isere’elu, ona o le losilosivale o le tupu o A’apo i le tovine a Napota po’o lona fanua. Ina ua malele le fanoga o le tupu e

aumai mo ia le fanua. Peita'i, sa tali mai i ai ma le fa'amaoni Napota e fa'apea: ***“Ia fa'amamao e le Alii ia te a'u ona ou avatu ia te oe le tofi o o'u tamā.”*** O lenei tali, sa matuā lē fiafia i ai A'apo....aua o lona mana'o ia maua e ia le fanua lenei o Napota aua o le fanua e ola lauusi ai so'o se la'au 'aina o le lau'ele'ele o fa'amanuiaga. Ioe, fai mai le tala ina ua mātauina e le masiofo o Iesepela foliga tigā o le tupu, ona ia fa'atulaga ai lea o se fa'amasinoga lē aloa'ia, na tu'ua'ia ai Napota fa'apea sa upuleaga Napota i le tupu. E ui ina e leai se sala a Napota, ae na ta'usalaina o ia e le fa'amasinoga, ma fetogia ai i ma'a se'ia o'o ina oti, ma ave ai loa e le tupu lana tovine e fai mana tovine. Ioe, fanau e leaga le mana'o tele. Va'ai la tatou iai, ua avea le mana'o tele o A'apo i le tovine a Napota, ma ala ua fa'ao'o ai le leaga ia Napota, lea ua i'u ai ina o'o le oti ia Napota le Iesere'elu. O le tatou tala lena o lenei taeao. Tamaiti, e leaga le mana'otele. Ia manatua o le Atua, e na te le tu'ulafoaiina i tatou, o le Atua e aua'i ma i tatou i so'o se mea tatou te iai.

FESILI:

- 1. Aisea na fasiotia ai e A'apo Napota?**
Ua mana'o A'apo i le tovine a Napota
- 2. O le a le moliaga na tu'ua'ia ai e Iesepela Napota?**
Fai mai ua upuleaga Napota
- 3. O le a le fa'asalaga sa faia ia Napota?**
Sa fetogi i ma'a, ma oti ai.
- 4. O le a se a'oa'oga sa o tatou maua mai i le tala sa fa'amatalaina?**
(tu'u le avanoa mo le fa'asoa a nai fanau)

AOAOGA:

1. Ia gata lo tatou mana'o i mea ua foa'i mai e le Atua mo i tatou
2. Aua le losilosivale pei o le tupu o A'apo
3. Talia meaalofoa ua foa'i mai e le Atua mo i tatou ma o tatou aiga

PESE: A tumau ia Iesu

- | | |
|---|--|
| (1). <i>Tatou te filemu</i>
<i>Aua o Ia o le ala moni</i>
<i>O lona finagalo ia tatou salamo</i>
<i>E maua ai e i tatou le malo</i> | (2). <i>E fa'ateaina ai le fefe</i>
<i>E leai se tiga</i>
<i>E leai foi se ma</i>
<i>Pe a tatou fa'atuatua</i> |
|---|--|

Tali: *Talitonu ma usitai*

Ia Iesu Keriso e leai se tasi

Talitonu i le Alii o Iesu.

Ia manuia tele lenei Aso Sa

ASO SA- AOKUSO 09, 2026

MATAUPU: “O LE PEPELO O ANANIA MA SAFAIRA”


TUSI FAITAU: GALUEGA - 5:1-11

SINI: Ia malamalama tamaiti e leaga le pepelo, e silafia e le Atua mea uma..

TAULOTO: “**O LE ATUA AUAI IA I TATOU NA TE SILAFIA MEA UMA**”

FESOASOANI MO FAIAOGA: E ofo alofa ma fa atalofa atu foi i lenei taeao fou. Malo le soifua manuia, manatu lava ua maua se malosi fa asili aua la tatou pito-la au tau’ave mo nai fanau, ua tu uina le fa’atuatuga o nai matua ma aiga ia i tatou ina ia tapu’e ma tapena lo latou soifua tuputupu a’e mo le Atua ma lana Talalelei. O le fa’asologa masani lava, o lea ua o’o mai le tatou mataupu i le tala ia Anania ma Safaira. O le ulugali’i foi lea na pepelo e fa’atau lo la fanua. O nai amataga lava e tatala ai la outou su’esu’ega, ae ua manatu lava, e fua lava e outou, le kilivaina o lesona mo nai fanau o lo’o outou mafuta, ina ia malamalama lelei i uiga o a tatou mataupu. Ia manuia le tapenaga o lenei Aso Sa.

FESOASOANI MO LE MATAUPU: Na fa’atau atu le fanua o Anania ma lana avā o Safaira, o ē na iai i le fa’apotopotoga Kerisiano i Ierusalem. E leai se tasi na fai i ai e fa’atau atu lo la fanua. Na fai la la’ua lava filifiliga e fa’atau atu. Peita’i, la te le’i fa’atauina atu lo la fanua ona o le alolofa i so’o fou o Iesu. Ae o le mea moni, na manana’o Anania ma Safaira ia manatu isi fa’apea o i la’ua o ni tagata e lelei tele. O lea na la filifili ai e ta’u atu i le ‘au-Aposetolo, la te foa’i uma atu le tupe e maua mai i le fa’atauina o le fanua, ina ia fesoasoani ai i isi. Peita’i, e na o sina vaega o le tupe o le a la avatuina, ae e ta’u atu ua la foa’iina atu le tupe atoa. O le ā sou manatu i le mea lenā? Na alu atu Anania i le ‘au-Aposetolo, ma ave i ai le tupe. Peita’i, o lo’o silafia mai e le Atua e lē o aveina uma le tupe. O lea na fa’aioa mai ai e le Atua i le Aposetolo o Peteru, le lē fa’amaoni o Anania.



O le ā le tala pepelo o lo’o ta’u atu e Anania iā Peteru? Ioe. Ona fai atu lea o Peteru iā Anania: ‘Anania e, aiseā ua e fa’ataga ai Satani e u’una’ia oe e te faia lenei mea? O oe e ana le fanua. E le’i tau mana’omia fua ona e fa’atau atu. Ina ua uma fo’i ona fa’atau atu, na pule lava oe i lau mea e fai i le tupe.

Ae aiseā ua e fa'afoliga mai ai o lo'o aumai atoa le tupe, a o le mea moni ua na o se vaega o le tupe ua e aumaia? E lē gata ua e pepelo iā i matou, ae ua sili ona e pepelo fo'i i le Atua o lo'o silasila mai.

Ioe, e matuiā le mea na fai e Anania. Ua tala pepelo! E le'i faia e Anania mea na fai atu o le a ia faia. Na fa'afoliga atu o lo'o ia avatuina le tupe atoa. Peita'i, o lo'o ta'u mai e le Tusi Paia sa tatou faitauina le mea na tupu. Na fa'apea mai: 'Ua fa'alogo Anania i ia upu, ona pa'ū lea i lalo ma oti ai.' Na ta'ia e le Atua Anania, ma oti ai, ona ave lea o lona tino i fafo ma tanu ai.



Mulimuli ane, ae sau loa Safaira. E lē o iloa e Safaira le mea na tupu i lona to'alua. O lea na fesili atu ai Peteru: 'Pe na lua fa'atauina atu le fanua i le aofa'iga lea na lua aumaia iā i matou?'

Ua tali atu Safaira: 'Ioe, na ma fa'atauina atu le fanua i tupe na.' Ae na tala pepelo Safaira! Na la teuina le isi vaega o le tupe na maua mai i le fa'atauina atu o le fanua. Na ta'ia foi e le Atua Safaira, ma fa'apea foi ona oti ai o ia. Ioe, fanau. E leaga le pepelo ma le fa'afoliga i luma o tagata atoa ma le silafaga a le Atua. o lea ua feoti Anania ma Safaira, talu lo la'ua pepelo o lo'o silafia e le Atua mea lilo uma lava. Ioe, e leai se mea lilo e tatou te faia, e lilo i le silafaga a le Atua. O le Atua o lo'o silafia mea uma o lo'o tatou faia. Ia manuia outou le fanau.

FESILI:

1. Aisea na feoti ai Anania ma Safaira?

Ua pepelo i tupe o lo la'ua fanua na fa'atau/Ua pepelo i le tagata ma le Atua.

2. O ai na fai iai e o e fa'atau lo la'ua fanua?

E leai se tasi, o la'ua lava na manana'o e fa'atau lo la'ua fanua

3. O le a le fa'asalaga sa faia e le Atua mo la'ua?

Na ta'ia e le Atua ma feoti ai i la'ua.

4. O le a se a'oa'oga sa o tatou maua mai i le tala sa fa'amatalaina?

(tu'u le avanoa mo le fa'asoa a nai fanau)

A'OA'OGA:

1. E leaga le pepelo ma le ola fa'afoliga, pei o Anania ma Safaira
2. E leaga le ola fa'amaualuga ma le mana'otele
3. Talia meaalofoa a le Atua ua ia foa'i mai mo tatou.

PESE: Anania ma Safaira (Suliveta Kurene: Volume 2)

1. Ua ta 'ua mai e le Tusi Sa

Sa fai ma fa'amanuiaga

Ofo atu o la fanua i le Atua

O le a la o ma fa'atau atu, Ae aumai uma lona tau

Leai se mea e pule ai

Ae aumai uma ma tu'u atu i le lima o le faifeau

Tali: *Ua tele tupe ha ha.*

Ua taulia le fanua

Ua tonu i o la manatu e sili ona vaelua

E le o iloa mai e se tasi, ae galo ai le maasiasi

O loo sisila mai fofoga o le Tama oi le lagi.....

La, la la la la Ho ho ho ho

Se ua sau nei le tiapolo ma fa'asese o laua loto

Talofa e, na o le toilalo popo

Ia manuia tele lenei Aso Sa

ASO SA- AOKUSO 16, 2026

MATAUPU: "O MAU'OA MA LE TAGATA MATIVA"

TUSI FAITAU: LUKA - 16:19-25

SINI: Ia malamalama tamaiti e taua le ola foa'i mo so'o se tasi e mana'omia se fesoasoani..

TAULOTO: O LE ATUA AUAI IA I TATOU, NA TE SILAFIA MEA UMA”

FESOASOANI MO FAIAOGA: Ua se’e lo tatou sa folau o lenei kuata aoga. malo le soifua manuia, malo le onosa,i, fa,afetai le lava-papale mo le galuega ua vala,auina lo outou soifua ofoina mo le Atua ma lona finagalo. Manatu o lea lava o lo,o fa,agasolo pea a tatou lesona e tusa ai ma le ta’iala aoao o lenei masina, aemaise o mataupu e pei ona tu’uina atu, mo nai fanau ina ia lava tapena ai i latou mo le savaliga i lenei vaiseuga o lo latou soifua tuputupu’ae i totonu o le n’uu ma le Ekalesia. Manatu e tu’uina atu le amataga o le tatalaina o la outou su’esu’ega mo le lesona o lenei Aso Sa. E ui o se tala masani, ae taumafai pea ina ia iai ni nai suiga mo le fa’alogo a nai fanau, ina ia ‘anoa i le latou fa’alogo tala ia e fa’amatala ai fa’ataoto a Iesu e uiga i le malo o le Atua. Ia manuia a outou tapenaga.

FESOASOANI MO LE MATAUPU: O le uiga lena o le tala-fa’afa’atusa a Iesu ia Lasalo ma le mauoa. (O Lasalo ma le tagata mau’oa, o ni tagata i se tasi o tala fa’atusa a Iesu. I lenā tala, na fa’asino atu nei tagata i ni vaega se lua o tagata: (1) o ta’ita’i lotu Iutaia fa’amauualuluga i aso o Iesu, ma le (2) o tagata na talia le fe’au a Iesu ma le loto mauualo.)

I le Luka mataupu 16, ua fa’amatala ai e Iesu ni suiga tetele na tutupu i olaga o ni tamāloloa se to’alua. Na iai se tagata mau’oa na tele lona tamaoaiga i le tino. Ae na masani ona nofo i le faitoto’a o lona pā se tagata ‘aisi e igoa iā Lasalo, lea e mana’o e ‘ai i mea e to’ulu ifo mai i le laulau ‘ai a le tagata mau’oa. A o fa’agasolo taimi, fai mai na maliu Lasalo ma ua ave o ia e agelu i ‘autafa o Aperā’amo. Na maliu fo’i le tagata mau’oa ma tanu o ia. I le tala fa’atusa, na fa’amatalaina ai nei tamāloloa o lo’o ola pea ina ua mavae le oti. Na fa’apuapugatia le tagata mau’oa i le afi, ma talosaga atu iā Aperāamo e ‘auina mai Lasalo e fufui le tumutumu o lona tamatama’ilima i le vai, ma fa’amālū ai le laulaufaiva o le tagata mau’oa. Na te’ena e Aperā’amo le talosaga a le tagata mau’oa, ma ta’ua ai ua matuā suia le tulaga o o la olaga. Na ia ta’ua fo’i ua iai se vanu tele i lo la vā, ma e lē mafai ona sao ai se tasi. Ioe, fanau, o le ata atoa lena o le tatou tusi faitau o lenei taeao. Ua tatou va’ai iai i le tagata sa tele lona tamaoaiga sa ia maua, ma ua ia le manatu ai e fesoasoani ma ave se meaai lelei e taumafa ai Lasalo, ae ua na o ni vaega o ana mea’ai e to’ulu mai i lana la’o’ai e ‘ai ai si tamaloa o Lasalo. O Lasalo o se tagata lotomaulalo, o se tagata e na te taliaina so’o se mea lava e pau mai i le la’o’ai a le mau’oa, e na te talia lava ma loto fiafia. O Lasalo le fanau, o le ata o le tagata e na te talia a’oa’oga a Iesu, e na te talia foi Iesu i lona loto fiafia. Peita’i, o le mau’oa, o le ata o le tagata fa’amauualuga e na te le taliaina Iesu i lona loto. Ioe fanau, e po’o a lava fita ma faigata, e o’o mai ia i tatou, e le tu’ulafoa’iina lava i tatou e le Atua. Ia tatou maua le filemu o le Atua, tatou te talia ai ma le fiafia mea uma ua ia foa’i mai mo i tatou. Ia manuia outou le fanau.

FESILI:

1. O ai Lasalo?

O Lasalo o le tagata mativa

2. O le a le uiga o le mau'oa?

O le tagata e tele lona tamaoaiga e faula'i ana 'oa

3. O le a le fa'asalaga sa faia e le Atua mo i la'ua?

Na fiafia Lasalo, ae na fa'asalaina le mau'oa i le vevela o le afi.

4. O le a se a'oa'oga sa o tatou maua mai i le tala sa fa'amatalaina?

(tu'u le avanoa mo le fa'asoa a nai fanau)

A'OA'OGA:

1. Ia tatou maua le loto maulalo pei o Lasalo
2. E leaga le ola fa'amauualuga pei o le mau'oa
3. Ia tatou ola fesoasoani mo e mana'omia se fesoasoani.

PESE: Ou te tulai ma savali, ta'u atu i lo'u Aiga e matautia lou mana

Ia manuia tele lenei Aso Sa

ASO SA- AOKUSO 23, 2026

MATAUPU: "UA USITAI SAULO I LONA TAMA"

TUSI FAITAU: 1 SAMUEL 9: 1-5

SINI: Ia malamalama fanau e taua le ola usita'i i matua.

TAULOTO: "O LE ATUA AUAI IA I TATOU, NA TE SILAFIA MEA UMA"

FESOASOANI MO FAIAOGA: Fa'atalofa ma ofo alofa atu ia outou Susuga i Faiaoga. Malo le tauata'i, malo foi le fa'amalolosi i lo tatou vala'auina ua tatou galulue ai mo nai fanau a le nu'u ma le Ekalesia. Manatu ua maua se malosia e fa'aauau ai a tatou tapenaga mo lenei Aso Sa. O lea ua fa'agasolo lava a tatou lesona e pei ona masani ai. Ae lelei pe a toe fai sina fa'amanatu mo nai lesona ua tuana'i atu, ina ia o gatasi a tatou lesona ma le sauni atu o nai fanau mo le latou su'ega fa'amanatu mo le Aso Sa o i luma. A ma'ea lena ona fa'agasolo loa lea o le tatou lesona o lenei taeao: "Ua usitai Saulo i lona Tama" O le tala ua masani ai le fa'alogoa a nai fanau, ae lelei ona saili ane nisi metotia lelei e fa'amatala ai le lesona mo lenei Aso Sa. E tu'uina atu nai amataga ia e tatala ai a outou su'esu'ega, ae ta'oto atu lava mo le fa'afaigofieina mo nai fanau o lo'o outou mafuta. Ia manuia le tapenaga.

FESOASOANI MO LE MATAUPU: Amata i ni nai fesili o lesona ua tuana'i atu, a ma'ea ona soso'o loa lea ma le fa'amatalaina o le lesona o lenei Aso Sa.

O le tatou tala i lenei taeao. “Ua usitai Saulo i lona Tama” O lea ua tu’uina atu le ata lenei o le fa’au’uina o Saulo e fai ma tupu o le nu’u o Isaraelu, manatua foi tamaiti, o Saulo o le ulua’i tupu lea o Isaraelu. Ioe, lea ua fa’au’uina Saulo e Samuelu e fai ia ma tupu o le nu’u o le Atua.



Pei ua manino mai o le fa’alogo ma usita’i i o tatou matua, e le pine ona tatou maua o fa’amanuiaga a le Atua e mulimuli mai. O le ata lena o lea ua outou va’aia ia Samuelu lea e liligi le suāu’u i le ulu o Saulo. E fa’aalia ai ua filifilia o ia e fai ma tupu. Sa fetalai le Atua ia Samuelu ia liligi le suāu’u i le ulu o Saulo. O se suāu’u fa’apitoa lava mo tupu ma e manogi manaia tele.

Sa manatu Saulo e le lava lona lelei e fai ai o ia ma tupu. O ana upu ia e iloa ai e le o se tagata e fa’amaualuga lona loto ina ua filifilia o ia e fai ma tupu. ‘O a’u e tupuga mai ia Peniamina, o le aupito itiiti i Isaraelu,’ o ana upu ia ia Samuelu. ‘Aiseā ua e fai mai ai o le a fai a’u ma tupu?’ E fiafia ea le Atua ia Saulo ona e le manatu o ia, ia maua ma tāua. O le mafua’aga lena sa Ia filifilia ai o ia.

Ae o Saulo e le o se tagata mativa pe pu’upu’u. E sau o ia mai se aiga mau’oa, ma o se tagata ‘aulelei tele toe umi. E tusa o le futu e umi atu ai o ia i so’o se tagata lava o Isaraelu! O Saulo foi o se tagata e saoasaoa tele ma le malosi. Ua fiafia nei tagata ina ua filifilia e le Atua Saulo e fai ma tupu. Ona amata lea ona latou alalaga: ‘Ia soifua le tupu!’ Ioe fanau, o le usita’i o Saulo i lona tama ma le fa’atonuga sa fai atu ia Saulo e o atu ma se tasi o taulealea ma o e saili mai asini ua leiloa. O se mea pito i taua tele lenei mo tatou foi, manatua foi le tulafono e lima lea e fa’apea mai: “IA E AVA I LOU TAMA MA LOU TINA ONA FOA’IINA ATU LEA E LE ATUA IA TE OE O ASO E TELE E TE OLA AI, I LE

NU’U E FOA’INA ATU E LE ATUA IA TE OE” Ia ua va’ai la tatou iai, o le usita’i o Saulo e tula’i ma alu e fai le fa’atonuga a lona tama o Kiso, a o lea ua fa’amanuiaina ai o ia e fai ma tupu o le nu’u o Isaraelu. E lelei tele le usita’i a fanau? Manatua foi so’o se mea tatou te iai e iai fa’atasi le Atua ma i tatou. Ia manuia tele outou le fanau,

FESILI:

1. E fa’aapefea ona tatou iloa e usita’i Saulo i lona tama?

Ina ua fa’atonu e lona tama Saulo e o e saili mai asini.

2. O ai na fai iai Saulo la te oe e saili mai asini a lona tama?

O lana auuauna, o le taule’ale’a o lona aiga

3. O le a le fa’amanuiaga sa maua e Saulo?

Na fa’au’uina o ia e fai ma tupu o Isaraelu.

4. O le a se a’oa’oga sa o tatou maua mai i le tala sa fa’amatalaina?

(tu’u le avanoa mo le fa’asoa a nai fanau)

A’OA’OGA:

1. E taua le ola usita’i i matua.
2. Ia maua le loto mauualalo e pei o Saulo, ina ua fa’au’uina o ia e fai ma tupu
3. Ia auuauna ma le loto mauualalo.

PESE: Fa’alogo ma usita’i

Ia manuia tele lenei Aso Sa

ASO SA- AOKUSO 30, 2026

MATAUPU: “MATAUPU FA’AMANATU

SINI: Ia malamalama fanau e taua tele lo latou manatua ma tauloto mau o le Tusi Paia..

FESOASOANI MO FAIAOGA: E fa’atalofa atu ia outou Susuga i Faiaoga; malo le tauata’i o lea ua tatou o’o mai i le toe Aso Sa o lenei masina amata o la tatou Aoga Aso Sa. O le Aso Sa lenei e feagai ai nai fanau ma fa’amanatu o lesona ua tuana’i atu. O fesili na ua tu’uina atu o fesili lava ia sa fai ai

fa'amanatu mo nai fanau. Manaia foi ae tapena ane nisi fesili mo le fa'amoemoe o lenei Aso Sa. Ia manuia tapenaga uma.

Fesili ma Tali

1. Aisea na fasiotia ai e A'apo ia Napota?

Ua mana'o A'apo i le tovine a Napota

2. O le a le moliaga na tu'ua'ia ai e Iesepela Napota?

Fai mai ua upuleaga Napota

3. O le a le fa'asalaga sa faia ia Napota?

Sa fetogi i ma'a, ma oti ai.

4. Aisea na feoti ai Anania ma Safaira?

Ua pepelo i tupe o lo la'ua fanua na fa'atau atu.

5. O ai na fai iai e o e fa'atau lo la'ua fanua?

E leai se tasi, o la'ua lava na manana'o e fa'atau lo la'ua fanua

6. O le a le faasalaga sa faia e le Atua mo la'ua?

Na ta'ia e le Atua ma feoti ai i la'ua.

7. O ai Lasalo?

O Lasalo o le tagata mativa

8. O le a le uiga o le mau'oa?

O le tagata e tele lona tamaoaiga e faula'i ana 'oa

9. O le a le fa'asalaga sa faia e le Atua mo i la'ua?

Na fiafia Lasalo, ae na fa'asalaina le mau'oa i le vevela o le afi.

10. E fa'aapefea ona tatou iloa e usita'i Saulo i lona tama?

Ina ua fa'atonu e lona tama Saulo e o e saili mai asini.

11. O ai na fai iai Saulo la te oe e saili mai asini a lona tama?

O lana auauna, o le taule'ale'a o lona Aiga

12. O le a le fa'amanuiaga sa maua e Saulo?

Na fa'au'uina o ia e fai ma tupu o Isaraelu.

Ia manuia Suega o lenei Aso Sa

MANATU TAIALA O SETEMA: “O LE ATUA FAITAUAGA”

ASO SA- SETEMA 06, 2026

MATAUPU: “IA FAI MEA SILI”

TUSI FAITAU: KENESE - 4: 1-7

SINI: Ia malamalama tamaiti ia fai mea sili e tusa o le foa’i a le Atua na ala mai i lona Alo o Iesu.

TAULOTO: ‘O LE ATUA FAITAUAGA IA IESU KERISO, O LE MEA SILISILI LEA UA FA’AOLAINA AI LE LALOLAGI AGASALA”

FESOASOANI MO FAIAOGA: Soifua manuia i le alofa ma le agalelei o le Atua. Fa’atalofa atu ai ia outou Susuga i Faiaoga, malo lava le fa’amalolosi, i lenei foi vaiseuga o le faigamalaga a le Ekalesia aoao ma ona faiva alofi-lima. O le taeao lenei o lo’o fa’amanatuina ai le toa’i taunu’u mai ai o le Talalelei i Samoa ma ona laueleele ua tusa nei ma le 196 tausaga.. Ia e ta’oto atu lava ia outou Susuga se fa’amatalaga faigofie mo nai fanau. Ae saga’i ane loa mo le tatou galuega fa’aauau i le ulua’i Aso Sa foi o lenei masina ua tatou aulia manuia mai, o le Aso Sa o le Talalelei. E leai lava se va’aiga fou, se’i vagana ai ni nai suiga faigofie e tou te fua lava i nai fanau o lo’o outou mafuta, ina ia malamalama ia tatou lesona o lo’o fa’amatalaina. O lea ua tatou iai i le tala a Kenese, e ui lava o se tala ua masani ai la outou fa’afofoga, ae ese foi le matagofie, pe afai e tatou te fa’amatalaina ma fa’atino ane ina ia ta’osoina ai pea nai fanau mo la latou savaliga. Ia manuia le feagai ai ma le lesona o lenei Aso Sa.

FESOASOANI MO LE MATAUPU:

O le tatou lesona o lenei taeao, IA FAI MEA SILI, manatua foi outou le fanau o le taeao lenei o le taeao o le Talalelei. O le taeao lenei o lo’o fa’amanatuina ai e le Ekalesia aoao le taunu’u mai o le Talalelei i Samoa ma ona laufanua. A o le tatou lesona, o le tala ia Kaino ma Apelu o la’ua ia o le fanau a Atamu ma Eva le ulua’i tagata sa tu’uina e le Atua e leoleo le fa’atoaga i Etena. Fai mai le tala sa aveese mai Atamu ma Eva mai le fa’atoaga, ona ua le usita’i la’ua i le fa’atonuga a le Atua sa tu’uina atu ia i la’ua le va’aiga o le fa’atoaga. Peita’i, e ui lava na o ese la’ua ae sa o lava ma fa’amanuiaga a le Atua. fai mai ina ua fanau mai Kaino, ona fa’apea lea o Atamu, **“Ua ‘ou maua le tagata mai le ALI’I.”** ona toe fānau mai fo’i lea o lona uso o Apelu. O Kaino ma Apelu o le ‘au uso i la’ua i le taimi lea. O Apelu o le fai lafu manu o ia, a o Kaino, o le galue fanua o le faifa’atoaga ia. Fai mai ua o’o ‘ina ‘atoa o aso, ‘ona avatu ai lea e Kaino o fua o le fanua e fai ai le taulaga i le ALI’I. A o Apelu, ‘ua ia avatu fo’i ulua’i tama o lana lafu, o manu ē pepeti ai lava. ‘Ua silasila mai le Ali’i ‘iā Apelu, ‘atoa ma lana taulaga; ae peita’i o Kaino ma lana taulaga, ‘ua ia lē silasila i ai. ‘Ona ita tele ai lea o Kaino, ‘ua fa’a’ū’ū lava ona mata. Le ala lea na fetalai atu ai le ALI’I ‘iā Kaino,

“Se a le mea ‘ua e ita ai? Se a fo’i ‘ua fa’a’ū’ū ai ou mata? Pe ‘āfai ‘e te amio lelei ‘e te lē maua ‘ea le fiafia. Ioe fanau, ua silafia lelei lava e le Atua le tagata fai mea lelei, o le tagata e ofoina atu mea lelei ma mea silisili ona matagofie e fai-aulaga atu ai i le Atua. Aua o le taua lea o lenei Aso Sa, o le Aso Sa o le Talalelei, e fa’amanatu mai ai ia i tatou uma. Le aulaga o le Fa’aolataga, sa faia e Keriso mo tatou ma le lalolagi atoa ina ia tatou maua manuia o le Atua e fa’avavau. O le fai mea lelei ma le fai mea silisili o le Atua, na ia foa’i mai ai lona atalii pele e to’atasi e faiaulaga mai ai mo tatou uma. Fai mai le tatou lesone o lenei taeao, “Ia fai mea sili” Ia fai mea sili e pei o Apelu na ia ofoina mea silisili o lana lafu manu e fai ai lana aulaga i lona Atua. Ia tatou fai mea sili ma fai mea lelei mo le Atua i so’o se ala o ana fa’amanuia mo i tatou uma. Ia manuia tele outou le fanau.

FESILI:

- 1. Aisea na le silasila ai le Atua i le aulaga a Kaino?**
Ua fai aulaga Kaino i mea le lelei o lana fa’atoaga
- 2. O le a se lagona o Kaino ina ua le silasila le Atua i lana aulaga?**
Ua le fiafia lona loto i lona uso o Apelu
- 3. O le a le uiga o lou fai mea sili mo le Alii?**
Ia e ave mea lelei ma mea silisili mo le Alii.
- 4. O le a se a’oa’oga sa o tatou maua mai i le tala sa faamatalaina?**
(tu’u le avanoa mo le faa’soa a nai fanau)

A’OA’OGA:

1. E leaga le fai mea leaga o lo’o silasila le Alii i mea uma
2. E le lelei le ola fa’amauulaga ma le tau masui
3. Ia tatou fai mea sili mo le Atua i mea uma tatou te maua.

PESE: (Ioane 3:16 & 17, tauloto fa’atasi e fanau fa’amolemole)

Ia manuia tele le Aso Sa o le Talalelei

ASO SA - SETEMA 13, 2026

MATAUPU: “O LE ATAMAI O IESU”

TUSI FAITAU: MAREKO - 6: 1-13

SINI: Ia malamalama tamaiti ia gata le mana’o i mea ua tatou maua e tusa o le foa’i a le Atua.

TAULOTO: “O LE ATUA FAITAUAGA IA IESU KERISO, O LE MEA SILISILI LEA UA FA’AOLAINA AI LE LALOLAGI AGASALA”

FESOASOANI MO FAIAOGA: E tu'uina atu le lima o le fa'atalofa i lenei foi vaega o le tapenaga mo la tatou pito-la'au tauave. Malo lava le onosa'i i feau ma galuega fa'agasolo o lenei vaiseuga o le tausaga. Taofi ua maua se malosi e fa'aauau ai la tatou su'esu'ega i le tatou lesona o lenei Aso Sa. o lea ua tuana'i atu le Aso Sa o le Talalelei, a o lea ua tatou talanoa ma fa'asoa i tusitusiga a Mareko e uiga i le atamai o Iesu, ma ana fa'ai'uga fai. Manatu o lea foi ua tatala atu i ni nai fa'asoa mo le tatou lesona ma a outou su'esu'ega, ae ta'oto atu lava foi i la outou fa'asoa le atoa mo nai fanau i le lesona e pei ona talanoaina mo lenei Aso Sa. Ia manuia a outou tapenaga uma.

FESOASOANI MO LE MATAUPU: O le tatou lesona o lenei Aso Sa: "O le atamai o Iesu" tamaiti a talanoa loa tatou i le atamai o Iesu. e le mafai ona tatou fa'amatalaina. Aua o Iesu o le puna o le potu ma le atamai, o Ia lava na mafua ai ona tatou maua le potu ma le atamai ina ua tatou fa'atuatua ma talitonu ia te Ia, o Ia lava o le Mesia o le Fa'aola o tagata uma lava. O le tala sa tatou faitauina, ua manino ai le te'ena e tagata Nasareta o Iesu, ae manatua foi tatou, o Iesu o le Nasareta moni lava, o lona nu'u lea. Peita'i sa va'ai tagata Nasareta o Iesu o le kamuta o le atalii o Iosefa ma Maria, ae le o se Mesia. O lo latou latalata iai sa avea ai ma fa'alavelave i lo latou talitonuga i lona MANA, aemaise o ana a'oa'oga sa latou fa'alogo i ai i totonu o le sunako. O le le talitonu o lona nu'u, na fa'atapula'aina ai le faia e Iesu o vavega tetele i'ina, se'i vagana ai nai tagata mama'i sa ia fa'amaloloina. O le mana ma le pule sa tu'uina atu e Iesu i ona so'o e latou te o e fa'amalolo ai mai ma tutuli ai temoni. O se va'aiga uiga ese lea ia Iesu, ua fa'aalia manino mai ai le fa'asoa atu e Iesu o lona potu ma lona atamai e tapena ai ona so'o mo le fa'aauaina o le galuega tala'i lea la tu'uina atu ia i latou. O le naunautaiga o Iesu ia fa'aleagaga ma fa'alagolago le 'au so'o i le mana o le Atua, o le potu ma le atamai ua Ia fa'asoa atu, e fa'atinoina ai le galuega. Ua fa'amanatu atu e Iesu, e le o le tino ma le malosi fa'aletino, a o le malosi fa'aleagaga ma le mana o le Atua e mafai ai mea uma lava. Ioe fanau, e taua foi mo tatou uma lenei lesona sa tatou talanoaina. Ua o tatou fa'alogo i tala o vavega sa faia e Iesu, ua a'oa'oina foi i tatou i le upu a le Atua, ma ua tatou iloa manino ai o Iesu o le puna Ia o le potu ma le atamai. Ia manuia tele outou le fanau.

FESILI:

- 1. Aisea na te'ena ai Iesu e lona nu'u?**
Ua ofo le nu'u i le atamai ma le potu o Iesu i ana vavega sa fai
- 2. O fea sa fai ai a'oa'oga a Iesu i lona nu'u?**
Sa fai a'oa'oga a Iesu i totonu o le malumalu
- 3. O le a se fa'amanuiaga mo tatou pe a tatou fa'alagolago ia Iesu?**

E tatou te maua le poto ma le atamai mai ia te Ia.

4. O le a se a'oa'oga sa o tatou maua mai i le tala sa fa'amatalaina?

(tu'u le avanoa mo le faasoa a nai fanau)

A'OA'OGA:

1. Ia tatou fa'atuatua ma talitonu ia Iesu o le puna o le poto ma le atamai.
2. E mai le Atua fa'amanuiaga uma o lo tatou ola
3. 'Aua tatou te ola fa'amasino atu i galuega a Iesu ua faia mo tatou.

PESE: (Pese #5 o le tusi pese) Le Alii e, le Atua e,

Ia manuia tele lenei Aso Sa

ASO SA- SETEMA 20, 2026

MATAUPU: "E LEAGA LEOLA FAAMAUALUGA"

TUSI FAITAU: Tanielu - 4: 28-33

SINI: Ia malamalama tamaiti e leaga leola fa'amaualuga.

**TAULOTO: "O LE ATUA FAITAILAGA IA IESE KERISO, O LE MEA SILSILI LEA UA
FAAOLAINA AI LE LALOLAGI AGASALA"**

FESOASOANI MO FAIAOGA: Ua se'e lava la tatou folauga fa'aauau o lenei vaiseuga o le faigamalaga. Malo le pale, malo le fa'amalolosi, e iai lava le talitonuga, o lo'o maua pea le malosi fa'asili mai le Alii o Ia o le matai o le galuega e tatou te malolosi ai. O lea ua tatou o'o mai i le molimau a Tanielu e uiga i le leaga o le tagata e fa'amaualuga. O le tala masani lava ia Nepukanesa ma lona fa'amaualuga ina ua ia va'ai atu ia Papelonias tele, ma ua ia manatu ai o lona malosi ma lona poto na ia faia ai lona malo tele ua iai. Manatu foi o se lesone taua lea mo nai fanau i le faigofie o lenei soifuaga o lo'o latou soifua ma o tatou ola ai. Ia ae saga'i ane loa mo le tatou lesone o lenei Aso Sa, manatua foi e na o se amataga e tatala ai nai mafauauga, ae ta'oto atu lava ia outou Susuga le fa'afoeina o lesone e fua lava i nai fanau o lolo outou mafuta. Ia manuia tapenaga uma o lenei Aso Sa.

FESOASOANI MO LE MATAUPU: O le tatou lesone falatulagaina o lenei taeao: "E leaga leola faamaualuga". Ioe, e leaga leola falamaualuga fanau. O ai la le tamaititi o tatou eola falamaualuga?. O ai o tatou e falamisa i le aoga ma le usitali i nai ona matua. Ioe fanau, e le lelei leola falamaualuga. O lou le usitali i nai ou matua, o lou ola falamaualuga foi na. Ioe, e foliga falapena le uiga o le tala lea sa tatou faitauina mai le Tusi o Tanielu i lenei taeao. Fai mai o le tupu lea o Nepukanesa o se tupu e amioletonu, e iai ana faiga fa'apiopio sa ola ai. O lona olaga e fa'amaualuga i mea ua maua e lona malo, ua galo ai ia te

ia o mea uma ua ia maua o mea uma ia e mai le Atua Silisiliese. Ua tulaga lelei lona malo ua ia va'ai atu iai. Lea na mafua ai ona ia tautala atu ai e fa'apea: **“E le o Papeletonia tele ea lenei, na a'u faia i lo'u malosi tele lava, e fai ma fale o le malo, e viia ai lo'u mamalu”**. Va'ai la tatou iai, lea ua va'ai loa i le tulaga matagofie ma le mauualuga ua iai lona malo, ua galo ai loa le va'ai e tataua ona iloa atu ai le Atua Silisiliese, o le puna o mea e tele ma le matagofie o le foafoaga na ia faia mo le tagata. Ua fa'amaualuga Nepukanesa, ma ua leiloa ai e Nepukanesa le tupu le Silisiliese o le Atua e to'atasi. O le ala lea na ia 'ai ai i le mutia e pei o povi, ua susu lona tino i le sau mai le lagi, ua tutupu lona lauulu e pei o fulu aeto, ma ona matiu'u ua pei o atigivae o manu felelei. Ioe o le fa'asalaga lena o le tagata fa'amaualuga na o'o ia Nepukanesa, ma le finagalo o le Atua ina ia a'oa'oina Nepukanesa ia iloa ma va'ai atu i le Atua Silisiliese e to'atasi lava Ia. Ina ua oo uma vaega ia ia Nepukanesa, fai mai ona atamai ai lea o ia ma ua faasaga a'e ona mata i le lagi, ua ia tapena foi le viiga ma le faafetai i le Atua Silisiliese o le soifua e faavavau, o lana pule foi e au tupulaga lava lea e faavavau. Ioe fanau, e leaga tele le ola faamaualuga. Ia tatou iloa ona ola fa'afetai atu i le Atua i mea uma ua ia foa'i mai mo lo tatou ola i aso uma. Ia manuia tele outou le fanau.

FESILI:

1. Aisea na faasalaina ai Nepukanesa e ai le mutia?

Ua ola fa'amaualuga Nepukanesa i mea ua ia maua

2. E lelei le ola fa'amaualuga pe leai?

E leaga le ola fa'amaualuga

3. O le a se mea lelei sa tupu mai ina ua ai e Nepukanesa le mutia?

Ua atamai ai ma iloa le Atua Silisiliese e to'atasi

4. O le a se a'oa'oga sa o tatou maua mai i le tala sa fa'amatalaina?

(tu'u le avanoa mo le faasoa a nai fanau)

A'OA'OGA:

1. E le lelei le ola fa'amaualuga e leai se mea aoga e maua mai ai
2. Ia tatou iloa o le Atua le pogai o fa'amanuiaga uma
3. E leai se isi e sili atu lona malosi, nai lo le Atua na faia i tatou uma.

PESE: (Pese #11 o le tusi pese) O lou mamalu le Alii e, E silisili lea

Ia manuia tele lenei Aso Sa

.....

ASO SA- SETEMA 27, 2026

MATAUPU: MATAUPU FA'AMANATU

FESOASOANI MO FAIAOGA: Fa'atalofa atu ia outou ia Ssuga i Faiaoga i lenei toe Aso Sa o lenei masina, malo le onosai malo le pale. Ua tu'uina atu nai fesili na mai lesonea ua tuana'i atu e fa'afaigofie ai a outou tapenaga mo le su'ega a nai fanau o lenei Aso Sa. E tu'uina atu lava ia outou Susuga le tapenaga mo su'ega a nai fanau e fua lava ia outou lesonea sa a'oa'oina mai lenei masina. Ia manuia tele tapenaga uma.

FESILI MA TALI

- 1. Aisea na le silasila ai le Atua i le taulaga a Kaino?**
Ua fai taulaga Kaino i mea le lelei o lana fa'atoaga
- 2. O a se lagona o Kaino ina ua le silasila le Atua i lana taulaga?**
Ua le fiafia lona loto i lona uso o Apelu
- 3. O le a le uiga o lou fai mea sili mo le Alii?**
Ia e ave mea lelei ma mea silisili mo le Alii.
- 4. Aisea na te'ena ai Iesu e lona nu'u?**
Ua ofo le nu'u i le atamai ma le poto o Iesu i ana vavega sa fai
- 5. O fea sa fai ai a'oa'oga a Iesu i lona nu'u?**
Sa fai a'oa'oga a Iesu i totonu o le malumalu
- 6. O le a se fa'amanuiaga mo tatou pe a tatou fa'alagolago ia Iesu?**
E tatou te maua le poto ma le atamai mai ia te Ia.
- 7. Aisea na fa'asalaina ai Nepukanesa e ai le mutia?**
Ua ola fa'amauualuga Nepukanesa i mea ua ia maua
- 8. E lelei le ola fa'amauualuga pe leai?**
E leaga le ola fa'amauualuga
- 9. O le a se mea lelei sa tupu mai ina ua ai e Nepukanesa le mutia?**
Ua atamai ai ma iloa le Atua Silisiliese e to'atasi
- 10. O le a se a'oa'oga sa e maua mai i se tala sa fa'amatalaina?**

Ia manuia Suega o lenei Aso Sa

ASO SA- OKETOPA 04- Oketopa 25, 2026

**O la Iesu! ‘Ina tu’u maia o tamaiti ia te A’u
Ia Fa’amanuia atu le Atua i Tapenaga uma mo le Lotu Tamaiti**



IA MANU’IA LE ASO SA O TAMAITI EFKAS 2026

MANATU TAIALA O NOVEMA: “O LE ATUA AGALELEI”

ASO SA- NOVEMA 01, 2026

MATAUPU: “MALAGA FAATASI MA LE ATUA”

TUSI FAITAU: MATAIO - 14: 22-27

SINI: Ia malamalama tamaiti a aunoa ma le Atua le faigamalaga e le taunu’u manuia.

TAULOTO: “O LE ATUA AGALELEI, O LE TA’ITA’I MALAGA FA’ATUATUAINA MA FA’AMOEMOEINA E TAGATA UMA”

FESOASOANI MO FAIAOGA: E ofo alofa ma fa’atalofa atu ia outou Susuga i Faiaoga, o lea ua ma’ea atu le malologa pu’upu’u sa feagai ma a outou Susuga i le tapenaga o le Aso Sa pa’epa’e o nai fanau ua mou atu. Malo fa’afetai le tapena. Ia viia lava le ATUA i mea uma ua tatou faia. O le Autu o lenei masina. “O le Atua Agalelei” taofi ua o fa’atasi ma le Autu o lenei Aso Sa “ Malaga fa’atasi ma le Atua” Ioe, a aunoa le Atua ma la tatou faigamalaga. E le taunu’u manuia foi a tatou tapenaga uma. Ae saga’i ane loa mo le tatou lesona o lenei Aso Sa, o lena ua tu’uina atu se amataga, e tatala ai a outou sailiiliga mo le lesona matagofie mo nai fanau. Ia mnauia tele tapenaga uma.

FESOASOANI MO LE MATAUPU: O le tatou lesona i lenei taeao: “Malaga fa’atasi ma le Atua” i le tusi sa tatou faitauina, o le molimau a Mataio e fa’atautau i le vavega lea na savali ai Iesu i luga o le vai,

lea na fa'aalia ai lana pule i le foafoaga ma le fa'amautinoaina o lona auai i taimi o puapuaga. {O le Pule a Iesu (Divinity)} O le savali o Iesu i luga o le vasa o lo'o fa'atusa ai lona mana ma lona pa'ia, e pei o le Agaga o le Atua sa i luga o vai i le foafoaga. Fai mai a o fefefe le 'au so'o i le afa ma manatu o se agaga, sa fetalai Iesu, "Ia loto tetele, o a'u lenei, aua nei fefefe. O le ata manaino lea ua fa'amanatu mai ai ia i tatou o kerisiano ua vala'auina ia fa'atuatua ia te Ia, ae aua le fefefe pe a o'o mai faigata o le olaga. O le uiga o le fetalai a Iesu; "Aua nei fefe". O Iesu o lo'o iai i taimi o faigata ma puapuaga ma afa o le olaga, ma e le tatau ona fefefe ona o lana pule ma lona alofa. Ioe fanau o lenei tala o lo'o a'oa'oina mai ai, o le faatuatua e tatau ona faaauau pea, e tusa lava pe iai i se tulaga faigata po'o afa o le olaga ma mea e tutupu, ia mautinoa lava o le Atua e le mafai ona ia tuulafoa'i mai i tatou e ala i lona alofa tunoa. Ia malaga fa'atasi ma le Atua e taunu'u ai le fa'amoemoe i taunuuga manuia. Ia manuia tele outou le fanau.

FESILI:

1. **O le a le mea sa feagai ma le Ausoo i luga o le vasa?**
O le afa ma le matagi ua agi tele mai
2. **O ai na savali i luga o le vai?**
O Iesu o Ia lava sa savali i luga o le vai
3. **Sa faatuatua le Ausoo pe leai?**
Leai, sa fefefe le 'au-soo.
4. **O le a se a'oa'oga sa o tatou maua mai i le tala sa faamatalaina?**
(tu'u le avanoa mo le faasoa a nai fanau)

A'OA'OGA:

1. Ia tumau le fa'atuatua ia Iesu o Ia lava e malu ai i afa o le olaga.
2. Malaga fa'atasi ma le Atua e taunu'u manuia ai lou fa'amoemoe.
3. O Iesu le tautai i taimi o faigata ma puapuaga.

PESE: A sousou le vasa o le olaga nei

Ia manuia tele lenei Aso Sa

ASO SA- NOVEMA 08, 2026

MATAUPU: 'UA FA'AMAGALO E ESAU LONA USO O IAKOPO"

TUSI FAITAU: KENESE - 33: 1-5

SINI: Ia malamalama tamaiti i le taua o le loto fa'amagalo e pei ona faia e Esau.

TAULOTO: O LE ATUA AGALELEI

FESOASOANI MO FAIAOGA: Faatalofa atu ia outou susuga i Faiaoga. Malo lava le pale i tiute ma faiva o loo outou feagai ai. E iai lava le talitonuga e ui o loo pisi i tatou i gafa tau i Aiga, o Nu'u ma le Atunuu, ae faafetai o loo maua lava lo outou avanoa e saili mafua ai aua fanau a le ekalesia ua tuuina atu i o outou aao ma o matou lima. Ia o lea ua tatou oo mai i le tala o lenei Aso Sa. "Ua faamagalo e Esau lona Uso o Iakopo" o lea ua tuuina atu foi nai amataga na mo la outou tapenaga, e fesoasoani atu ai i la tatou Lesona o lenei Aso Sa, ae ua taoto atu lava ia outou susuga ina ia faafaigofie tapenaga mo nai fanau o loo outou mafuta. Ia manuia tele tapenaga uma. God Bless!

FESOASOANI MO LE MATAUPU: O le tatou Lesona o lenei taeao “Ua faamagalo e Esau lona uso o Iakopo” Ina ua mavae le tele o tausaga talu ona valavala Iakopo ma lona uso o Esau. O lea faatoa toe feiloai i la’ua, talu ona sola ese Iakopo ona o lona fefe ia Esau ina ua ia ave faamanuiaga o le tofi o le ulumatua o Esau. o le ala na matuai fefe ai Iakopo i lona uso o Esau. Peitai, ina ua toe foi mai Iakopo ma feiloa i la’ua, o se vaaiga uiga ese lenei i le loto faamagalo o Esau i lona uso. Fai mai sa galo uma ia Esau mea na tutupu i le taimi ua tuanai atu, ae sa tamoe atu ma faafeiloai i lona uso o Iakopo, ua fusi ma opo, ua sogi atu ia te ia. Ua fetagisi ma ua fiafia, o le ata o le faamagaloina e Esau o lona uso o Iakopo. Ioe fanau, e ese ma le matagofie o se tagata e na te lagonaina le faamagalo atu i lona uso, poo se tasi sa faia se mea sese ia te ia. Ua le vaai lava Esau i mea sa tutupu i lo la va ma si ona uso o Iakopo, ao le mea sili ona taua ia Esau ua toe feiloai ma si ona uso ua leva tausaga o valavala. Ia, ua vaai la tatou i le lelei o le tagata e loto faamagalo. Ua galo uma mea sa tiga ma ita ai, ae ua ia faamagalo i lona uso. Ia faapenaina foi i tatou a tamaiti. Ia faamanuia atu le Atua ia te outou uma. Ia tatou maua le loto faamagalo, e pei o Esau.

FESILI:

1. Aisea na sola ai Iakopo?

Ua ia faoa le faamanuiaga o le tofi o le ulumatua o Esau

2. O le a se tali atu a Esau i lona uso ina ua toe foi mai?

Tamoe ma le agaga fiafia ma loto faamagalo.

3. Sa fefe Iakopo i lona uso o Esau?

Ioe, sa fefe ma popole i tumau le ita o lona uso.

4. O le a se a’oa’oga sa o tatou maua mai i le tala sa faamatalaina?

(faasoa ma nai fanau i le matagofie o le mataupu)

AOAOGA:

1. Ia maua le loto faamagalo e pei o Esau

2. ‘Aua le fefe e alu e feiloai ma se tasi sa e agaleaga i ai

3. Ia tumau le faatuatua i le Atua, o ia e faamagalo i tatou uma.

PESE: (Pese # 24 tusi pese) Ia pepese tatou nei, Faamanu ma Faafetai

Ia manuia tele lenei Aso Sa

ASO SA- NOVEMA 15, 2026

MATAUPU: “UA FA’AMALOLOINA LE TAGATA PIPILI”

TUSI FAITAU: GALUEGA - 3: 1-10

SINI: Ia malamalama tamaiti e mafai e Iesu ona tu’u mai lona mana e tatou te fa’aamalolo ai ma’i.

TAULOTO: O LE ATUA AGALELEI, O LE TA’ITA’I FA’ATUATUAINA MA FA’AMOEMOEINA E TAGATA UMA”

FESOASOANI MO FAIAOGA: Malo lava le onosa’i ma le lava-papale i lenei vaiseuga o le faigamalaga. E tu’uina foi le lima o le fa’atalofa ia outou Susuga i Faiaoga, malo lava le fa’aamalolosi, taofi ua

maua foi se malosi e fa'aauau ai a tatou galuega ua vala'auina ai i tatou uma, o le taeao lenei o lea ua tatou i ai i le molimau a le tusitala o Luka lea sa feagai ma le fa'amaumauina o tala o le tusi o Galuega a le Au-Aposetolo. Ona fa'apea lea, ua tu'uina atu nai tapenaga amata na e saunia ai a outou Susuga mo le tapenaga o lesona mo nai fanau. Ua tu'u atu lava le fa'amoemoega ia outou Susuga e fa'atauta'ia a tatou lesona e pei ona masani ai. Ia manuia tele tapenaga uma.

FESOASOANI MO LE MATAUPU: O le tatou lesona i lenei taeao. "Ua fa'amaloloina le tagata pipili" E tusa ai ma fa'amaumauga a Luka, o le tagata pipili lenei, e tusa ua 40 tausaga o pipili, na fanau mai lava o pipili. O le fa'aailoga o le umi ona leai o se fa'amalologa ua o'o i lona olaga. O le ata o le tagata ua le atoatoa le malosi i lona tino, atoa foi ma lona agaga.

O le tagata ma'i i le vaitau o Luka, o le ata va'aia lea o le le amana'ia, ma le fa'atuatua'ia o le tagata mama'i ma tagata vaivai, o le ata o le tu'ulafoa'iina o tagata vaivai ma le le taualoa ona o le talitonuga, e ala ona ma'i le tagata ona ua agasala. O foliga va'aia ia o lo'o taumafai Luka e fa'amatala mai i le tala lenei.

I le tulaga 'aisi o le tagata pipili, o le fa'aailoga o le le tagolima, ma le leai o se mea e fa'alagolago i ai le gasologa o lona olaga. O le tagata pipili lenei, ua fa'alagolago i le agalelei ma le lima foa'i o le tagata o lo'o aga'i atu i le malumalu e maua ai e ia ni tupe fa'atasi ai ma isi vaega o foa'i a tagata mo ia. Ioe, o le ata va'aia lea o lo'o fa'amatala mai e ala i le tagata pipili o lo'o 'aisi. O le feau lena lea e mana'omia ai se suiga i le ituaiga si'osi'omaga lea. Peita'i, na o le suafa o Iesu Keriso le fa'aola e suia ai si'osi'omaga fa'apea ma mea ua tutupu i tagata mama'i..

O Peteru ma Ioane o le ata va'aia lea o le Talalelei. O le fa'amalologa ma le fa'aolataga o le malo o le Atua ua aumai e Iesu Keriso ma ua tala'i mai e le 'au Aposetolo. Lea na la fa'amaloloina ai le tagata pipili ina ua la ta'u atu le suafa o Iesu Keriso le Nasareta e tula'i ai ma savali loa. Ioe, o se va'aiga uiga ese lenei i le va'ai a tagata e to'atele, le tagata ua tele tausaga o pipili a o lea ua savali ma osooso. Ioe fanau e leai lava se isi suafa e tatou te maua ai le fa'amalologa o o tatou tino mafaufau ma le agaga, ua na o le suafa lava o Iesu Keriso le Nasareta. Ia manuia outou le fanau.

FESILI:

- 1. O ai na faia le galuega fa'amalolo i le tagata pipili?**
O Ioane ma Peteru
- 2. O fea sa nofonono ai le tagata pipili?**
O luma o le malumalu i Matagofie
- 3. O a ni vaila'au sa fa'aaogaina e Peteru ma Ioane?**
E leai se vaila'au, na o le suafa lava o le Alii le Nasareta.

4. O le a se a'oa'oga sa o tatou maua mai i le tala sa fa'amatalaina?

(Fa'asoa ma nai fanau e uiga i le tala)

A'OA'OGA:

1. Ia fai Iesu ma papa o lo tatou olataga
2. Ua na o le sua o Iesu e tatou te malolo ai
3. Ia fai Iesu ma vailaau aoga i ma'i uma o lo tatou ola.

PESE: Savali ma oso ma vivii i le Alii

Ia manuia tele lenei Aso Sa

ASO SA- NOVEMA 22, 2026

MATAUPU: "UA TOE FA'ATUINA LASALO"

TUSI FAITAU: IOANE - 11: 40-45

SINI: Ia malamalama tamaiti e na o le Atua e iai lona mana e toe fa'atuina mai ai e ua oti.

TAULOTO: O LE ATUA AGALELEI, O LE TAITAI MALAGA FATUATUAINA MA FAAMOEMOEINA E TAGATA UMA"

FESOASOANI MO FAIAOGA: Fa'atalofa atu ia outou Susuga i Faiaoga i lenei foi vaiaso a o e sauni e tatala a outou su'esu'ega mo lenei lesona matagofie. E ui lava o se tala masani, ae ua iai lava le fa'amoemoe ua lava tapena a outou Susuga mo le lesona o lenei Aso Sa. Ae manatu lava e manaia foi ae fai ane ni nai fa'amanatu mo lesona ua tuana'i atu ina ia tapenapena ai nai fanau mo le latou Suega i le vaiaso fou. Fa'amanatu foi le taua o le Aso Fa'afetai i nai fanau ina ia latou manatua le fa'afetai i le Atua ona o lana fa'asoa i le ola ma le malosia i aso ta'itasi o lo tatou ola. Ia manuia tele tapenaga uma.

FESOASOANI MO LE MATAUPU: O le tatou lesona i lenei taeao; "Ua toe faatuina mai Lasalo" Fai mai le molimau a Ioane, sa oti Lasalo le uo a Iesu o le tuagane o Maria ma Mareta. Fai mai sa fetagisi Maria ma Mareta ona o lo la alolofa i lo la tuagane, mulimuli ane ua la o mai ma fa'aioa ia Iesu, pe ana e i'inei e le oti lo la tuagane o Lasalo. Sa fai atu Iesu ia i la'ua. 'Aua e te lua popole, e le o oti Lasalo. Tatou o e fafagu mai Lasalo. Ua o'o atu Iesu i le tu'ugamau ona ia fetalai atu lea, ua fa'apea atu, **"Ave 'ese ia le ma'a."** 'Ona fai mai lea 'ia te ia o Mareta le tuafafine o Lasalo, "Le Ali'i e, ua o'o ina manogi, auā o le fa' lenei o po talu ona oti o Lasalo". Ua fetalai atu Iesu ia te ia, **"Pe na 'ou lē fai atu ea iā te oe, afai e te talitonu, ona e iloa lea o le mamalu o le Atua"** Ioe, lea foi ua toe fa'amanatu atu e Iesu ia Mareta e tatau ona e fa'atuatua mai ia te A'U, o Iesu o le Alii Fa'aola o tagata uma lava. Fai mai ua ia fetalai atu ia 'upu, i lona Tama ma lana faa'fetai ina ua ia fa'aali mai ia te ia lona mana e fa'aolaina ai le tagata ua oti, ina ua ma'ea ona alaga lea o ia ua leo tele, "Lasalo e, 'inā sau ia i fafo. Ona alu ai lea i fafo o Lasalo, 'ua fusifusia ona vae ma ona lima i 'ie na tanuma'i ai, ua fusi fo'i ona mata i le solosolo. 'Ona fetalai atu lea o Iesu ia te i latou, "Tatala ia 'ia te ia, inā tu'u atu ia e alu." Ioe e matautia le Silisiliese o lenei vavega ua fa'atino e Iesu, ua ia toe fa'aolaina mai Lasalo mai le oti ma le tu'ugamau. Fanau e, e leai se tasi e mafai ona ia faia se vavega fa'apea, ua na o Iesu lava o ia o le Alo o le Atua soifua e pule i le ola o le tagata ma mea

uma o lana foafoaga mamana. Ioe, ua alagataua ona tatou fa'afetai a'e i le Alii, e pei foi o lenei vaitau taua o le Aso Fa'afetai. Ia tatou fa'afetai i le Atua ona o lona alofa e le mavae lea mo i tatou uma lava. Ia manuia tele outou le fanau.

FESILI:

1. E fia po na oti ai Lasalo?

E fa po talu ona oti Lasalo

2. Sa faigata ia Iesu ona toe fa'aola mai Lasalo?

Leai ma se faigata, na ona vala'au lava o Iesu sau i fafo Lasalo

3. O le a le fautuaga a Iesu sa fai ia Mareta?

Ia e fa'atuatua ma talitonu ia Iesu.

4. O le a se a'oa'oga sa maua mai i le tala sa fa'amatalaina?

(Fa'asoa ma nai fanau e uiga i le tala)

AOAOGA:

1. Ia fa'atuatua ia Iesu, o ia o le toetu ma le ola

2. E leai se mea e faigata i le Alii

3. 'Aua le masalosalo i le Alii Faaola.

PESE: (Pese # 2 o le tusi pese) Ina vivii i tatou nei, i le na faia i tatou

Ia manuia tele lenei Aso Sa

ASO SA- NOVEMA 29, 2026

MATAUPU: MATAUPU FAAMANATU

SINI: Ia iloa e fanau le taua o le manatuaina o tala o le Tusi Paia mai mataupu ua tuana'i atu

FESOASOANI MO FAIAOGA: Fa'atalofa ma ofo alofa atu ia outou Susuga i Faiaoga i le toe ASo Sa o lenei masina, malo le onosa', i malo le fa'amalolosi. Ua tu'uina atu nai fesili na mai lesona ua tuana'i atu e fa'afaigofie ai a outou tapenaga mo le suega a nai fanau o lenei Aso Sa. Ae taoto atu ia outou Susuga le tapenaga mo suega a nai fanau e fua lava foi i a outou lesona sa a'oa'oina mai lenei masina. Ia manuia tele tapenaga mo suega a nai fanau.

FESILI MA TALI

1. O le a le mea sa feagai ma le 'au soo i luga o le vasa?

O le afa ma le matagi ua agi tele mai

2. O ai na savali i luga o le vai?

O Iesu o Ia lava sa savali i luga o le vai

3. Sa fa'atuatua le 'au soo pe leai?

Leai, sa fefefe le 'au soo.

4. Aisea na sola ai Iakopo?

Ua ia faoa le fa'amanuiaga o le tofi o le ulumatua o Esau

5. O le a se tali atu a Esau i lona uso ina ua toe foi mai?

Tamoe ma le agaga fiafia ma loto fa'amagalo.

6. Sa fefe Iakopo i lona uso o Esau?

Ioe, sa fefe ma popole i tumau le ita o lona uso.

7. O ai na faia le galuega fa'amalolo i le tagata pipili?

O Ioane ma Peteru

8. O fea sa nofonono ai le tagata pipili?

O luma o le malumalu i matagofie

9. O a ni vaila'au sa fa'aaogaina e Peteru ma Ioane?

E leai se vaila'au, na o le suafa lava o le Alii le Nasareta.

10. Tusi mai sau fa'asoa i se tala sa fa'amatalaina o lenei masina.

Ia manuia suega o lenei Aso SA

MANATU TAIALA O TESEMA: “O IESU O LE TUPU O TUPU”

ASO SA- TESEMA 06, 2026

MATAUPU: “UA FAAALI LE AGELU IA SAKARIA”

TUSI FAITAU: LUKA - 1: 18-25

SINI: Ia malamalama tamaiti i le taua o le fa'aaliga a le Agelu ia Sakaria.

TAULOTO: O IESU O LE TUPU O TUPU, O LE ATUA O LE FA'AVAVAU UA IA I TATOU”

FESOASOANI MO FAIAOGA: Ua tatou o'o mai i le toe masina o lenei tausaga, malo le soifua manuia, malo le lava-papale i faiva o lenei kuata aoga, lea ua toe o se aga ona fa'ama'eaina lea. Faafetai atu ia outou Susuga i Faiaoga mo le galuega fita o lo'o outou feagai ai. Ae silasila ane loa i nai amataga ua tu'uina atu mo le tatou tapenaga mo lenei Aso Sa, pei lava ona masani ai, ua tu'uina atu le fa'atuatuaga ia outou Susuga mo le fa'afoeina o lesona a nai fanau o lo'o outou mafuta ina ia faigofie ai ona malamalama. O le tala ua masani ai le fa'alogo a fanau, ae lelei foi ona saili ane ni nai metotia mo nai fanau i le latou lesona o lenei Aso Sa ma le Fa'aali o le Agelu ia Sakaria. Ia manuia tapenaga uma.

FESOASOANI MO LE MATAUPU: Talofa tamaiti, malo le folau manuia, o lea ua tatou taunu'u mai i le toe masina o lenei tausaga 2026. Malo le fa'amalolosi. O le tatou lesona o lenei taeao. **“Ua fa'aali le Agelu ia Sakaria”** Fai mai le molimau a Luka ua fa'aali atu le agelu o Kaperielu ia Sakaria ma ta'u atu i ai ia Sakaria ma lana ava, o Elisapeta, o le a la fanauina se atalii, o le a la fa'aigoaina foi ia Ioane. Manatua

foi o Ioane, lea ua lauiloa o Ioane le Papatiso. Ioe ina ua ta'u atu e le Agelu lenei fa'aaliga ia Sakaria, sa le talitonu Sakaria, ona ua matutua i la'ua ma Elisapeta lona to'alua. O le mafua'aga lea na gu-gu ai Sakaria ona ua le talitonu i le feau sa ta'u atu iai e le Agelu. Sa auauna atu **Sakaria** ma le fa'amaoni i le Atua i totonu o le malumalu. Peita'i, ina ua tu'ua e Sakaria le malumalu, sa le mafai ona tautala o ia. Mulimuli ane sa to Elisapeta, e pei ona sa folafola mai e le agelu. Ioe, fa'amata o le a se lagona ma ni mafauauga o Elisapeta a o sauniuni mo le mauaina o se tama. O lana tala ua fa'apea ona faia i le Alii "ua ave'ese [lona] luma i tagata" e fa'ataua i le maasiasi sa feagai ma ia ona o se fafine e le fanau. I le taimi lea i le aganu'u a ia tagata, e maua luga tele le fanauina o se tamaitiiti, ma o le le mafai ona fanauina o se tamaitiiti e aumaia ai le le fa'aaloalogia ma se lagona o le maasiasi. Ioe, e tulagaese le fa'amoemoe o le Atua, ma lana fuafuaga mo le fanau mai o Ioane i nai ona matua o Sakaria ma Elisapeta. Fai mai o le taimi lava na fanau ai Ioane, na matala ai foi ma le fofoga o Sakaria, ina ua va'ai Sakaria i le tino mai o le fa'aaliga sa fa'aali atu ai le Agelu a le Atua ia te ia. Ioe fanau, e taua lo tatou talitonu ma le fa'atuatua i le Atua, i taimi ma aso uma e fa'aali mai ai lona alofa mo tatou uma. Ia manuia tele outou le fanau.

FESILI:

1. **Aisea na le talitonu ai Sakaria i le Agelu?**
Ua matutua i la'ua ma Elisapeta
2. **O le a le mea sa tupu ia Sakaria ina ua le talitonu?**
Ua le mafai ona tautala
3. **O le a se mea sa mamafa ia Elisapeta i le va'aiga a tagata?**
Ua matua o ia e lei maua lava sana tama.
4. **O le a se a'oa'oga sa o tatou maua mai i le tala sa faamatalaina?**
(Fai le fa'asoa a nai fanau)

A'OA'OGA:

1. Ia talitonu ma fa'atuatua i le Atua i taimi uma
2. O le Atua e mafaia mea uma lava, tusa poo le a le matua ua oo iai le tagata.
3. Fa'amaoni ma tumau i le Atua i taimi uma o lou olaga.

PESE: (faaaoga ane pese o le Kerisimasi faamolemole)

Ia manuia tele lenei Aso Sa`

ASO SA- TESEMA 13, 2026

MATAUPU: "UA FANAU IESU I LE FALE O MANU"

TUSI FAITAU: LUKA - 2: 1-7

SINI: Ia malamalama le fanau i ala o le Atua ma lona finagalo ia maua le loto maua lalo.

TAULOTO: O IESU O LE TUPU O TUPU, O LE ATUA O LE FA'AVAVAU UA IA I TATOU"

FESOASOANI MO FAIAOGA: Malo lava le tautai a’e, o lea ua tuta i matafaga lelei lo tatou sa folau o lenei tausaga, malo le onosa’i, fa’afetai le talisoa i le feau ma le galuega ua vala’auina ai lo outou soifua ma lo matou ola, ia ae saga’i ane ia mo le toe Aso Sa o le tatou Aoga Aso Sa o lenei Tausaga 2026. O le tala masani i le fanau mai o Iesu i le fale o manu, manatu e taoto atu foi ia outou Susuga le folasaga o nai fanau, ae ua na o se amataga lena e tatala ai a outou tapenaga mo le lesona o lenei taeao. Manaia ae fa’asoa ma nai fanau, tu’u pea ia i latou le avanoa e fa’asoa ai i ni meaalofo ma ni mea lelei sa faia e Iesu i o latou foi olaga, e suia ai le lesona, mai lona fa’ataotoga masani sa sau ai. Fai ni nai pese ma ni nai fesili e tatala ai la outou fa’asoa. O lena ua tu’uina atu nai ata, ma nai folasaga na mo se tapenaga e fa’alauiloa atili ai le folasaga o a outou tapenaga, O le ‘auga lea o lenei Aso Sa mulimuli, o le tu’uina atu o le avanoa i sa outou tapenaga mo le Kerisimasi ma nai fanau, e amata tapenapena ai se fa’atinoga mo lenei tausaga. Ia manuia tele tapenaga uma. Ia fa’amanuia atu foi le Kerisimasi ma le Tausaga Fou ia outou Susuga i Faiaoga ma nai o outou Aiga.

Ua fanau Iesu i le fale o manu



Pe e te iloa o ai lenei pepe laitiiti? Ioe, o Iesu. Fa’atoa fanau lava o ia i le fale o manu. O lo’o sapaia e Maria Iesu i le mea e teu ai mea ai mo povi ma isi mea ola e aai ai. Ae ai se ā ua i ai iinei Maria ma Iosefa fa’atasi ma manu? E le o se nofoaga lea e tataua ona fanau mai ai se pepe, a ea? Ioe fanau, o le ata atoa lena o le finagalo o le Atua mo le Mesia lea ua Afio mai. O le Mesia e sau e aumai le Fa’aolataga mo tatou ma le lalolagi agasala ina ia fa’aolaina tagata uma i lona Afio mai, ma ia tatou maua le loto maualalo e pei ona fanau mai ai i le fale o manu, o se ala fa’atauva’a ma le le taualoa.



Pe e mafai ona tatou iloa atu leoleo mamoe o lo'o o mai e va'ai Iesu? Sa i ai i latou i le vao i le po e tausi mamoe, ma na susulu se malamalama fa'ataamilo i a i latou. O se agelu! Na fefefe le 'au leoleo mamoe. Ae na fa'apea atu le agelu: 'Aua tou te fefefe! O lo'o ia te a'u se Tala lelei mo outou. O le asō, i Petele'ema, ua fanau ai le Mesia o le Keriso le Alii. O le a ia fa'aolaina tagata! O le a tou mauaina o ia o ta'ui i le ie o ta'oto i le fale o manu.' Ona fa'afuasei lea ona o mai agelu e to'atele ma vivi'i i le Atua. Ona fa'ataalise lea o le 'au leoleo mamoe e saili Iesu, ma ua latou mauaina nei o ia. Pe e te iloa ai se ā ua fa'apitoa ai Iesu? Pe e te iloa o ai *moni* o ia? Manatua, na ta'ua o ia o le Atalii muamua o le Atua. O lenei Atalii na galulue o ia ma le Atua i le faia o le lagi ma le lalolagi ma isi mea uma. Ia, o Iesu la lena! Ia manuia tele outou le fanau. Ia tatou maua se Kerisimasi fiafia, ma se Tausaga Fou manuia i le fanau mai o le pepe o lenei Tausaga 2026.

Ia manuia le kerisimasi ma Tausaga Fou